

A crea un discusion riba un asunto sin cu tin suficiente informacion

ORANJESTAD- Despues c'un matutino a cuestiona nombracion di e cabayero Hugo Mohamed na Fundacion Lotto pa Deporte, caminda hasta un miembro di Parlamento, esta Melvin Tromp a bay radio y cuestiona e maneho di e fundacion, a pone cu Hunta di Directiva di Lotto a dicidi di tene un conferencia di prensa, pa di e forma aki aclarar e nombracion aki. Hugo Mohamed, kende tabata trahando na departamento di monumentonan pa Gobierno, recientemente a baha cu pensioen pero a ser pidi pa continua pa sigui cu e trabou di supervision di facilidadnan deportivo, cu ta cay bou di fundacion Lotto pa Deporte. Abogado Benvinda de Sousa na comienso a aclarar cu no ta custumber pa bin dilanti y discuto asuntunan personal di un trahado den publico pero cu a pidi permiso di e propio señor Mohamed pa aclarar e situacion aki, caminda a trece cantidad di mal informacion, sin cu a busca e realidad di e situacion anteriormente. Lamentabel di e caso ta cu a bin dilanti y cuestiona hasta dos persona cu ta miembro di Hunta di Comisario di e fundacion, pa motibo di e nombracion aki, caminda a cuestiona e proceso bou di cual esaki a tuma luga. Abogado De

Sousa tabata compaña pa diferente miembro di directiva y a splica cu e publicacion di e matutino Awe Mainta, caminda a muestra cu lo no honra contract di Hugo Mohammed como administrador na Lotto pa Deporte, cu esaki no ta un informacion corecto. El a muestra cu e no sa for di ki fuente e matutino a haya e informacion pero e no ta cuadra cu nada y cu e ta lamenta cu no a busca pa sa kico tin di berdad. E personanan cu a duna e informacion, no ta all tanto di loke ta pasando den e caso aki. Presidente di directiva a bisa cu no ta existi ningun clausula den statutonan di Lotto pa Deporte cu ta bisa cu despues di dos luna por anula un contracto. Pa loke ta e caso di Mohammed, ta trata aki di un contracto laboral cu a keda firma y cu tin reglanan den ley y cu no por desvia di loke ta para den ley pa loke ta un contracto laboral. E meta principal di Fundacion Lotto pa Deporte, pa bende Lotto y genera entrada cu ta bay pa deporte, loke inicialmente tabata asina. Algun aña atras statutonan a wordo cambia y a inclui cultura tambe como parti di e funcionamiento di e fundacion y ora e directiva nobo a sinta, a bisa cu mester dedica tempo na loke ta meta principal di e

fundacion, cu ta di genera entrada pa deporte. E directiva anterior a construi diferente facilidad deportivo cu mester wordo maneha door di Lotto pa Deporte, cu ta un tarea grandi cu ta tuma masha hopi tempo y pa cual motibo a dicidi cu ta bay separa e facilidadnan deportivo y hinca nan den un otro fundacion, cual lo wordo yama FFD, cu ta Fundacion Facilidatnan Deportivo, pa haci e tarea pa administra Lotto y e facilidadnan mas facil. E fundacion aki a wordo lanta for di 2004 pero no a completa su procedura di yena e vacaturanan cu mester wordo haci door di Lotto, ASU y Gobierno. E facilidadnan deportivo mester a haya un organo separa pa maneha esaki. Mayoría di personal den Fundacion Lotto pa Deporte ta traha na e facilidadnan deportivo. Sr. Hugo Mohammed ta eherciando e funcion di hefe di e facilidadnan deportivo pa hopi aña caba. El a wordo poni na disposicion door di Minister na FLPD. Tur e trahadonan cu ta traha na e facilidadnan deportivo ta den servicio di FLPD, te ora cu nan wordo pasa pa FFD. A pone Mohammed na FFD y a duna algo extra mirando e cantidad di trabou cu e tin cu haci. For di aña pasa caba

ta den discusion pa finalisa cu e procedura pa yena e vacaturanan den FFD, pues pa e trahadonan pasa over. El a bay mas poco poco di loke a ser anticipa, según mr. De Sousa. Dado momento Mohammed mester a baha cu pensioen y tabatin hopi dia di vakantie aden. El a informa directiva cierto momento cu e ta tuma su vacacion pa despues baha cu pensioen. Net e momento ey tabata tumando luga trabounan di mantencion di varios di e facilidadnan y tabatin combersacion andando cu varios contractista, cual Mohammed tabata coordinando tur esaki. Pa motibo di percura pa continuidad, te ora cu e facilidadnan pasa over pa un Fundacion, a dicidi di dun'e un contracto di trabou, for di november 2011, pa un tempo defini, c'un clausula cu ta bisa esaki. E trahado durante e validez di e contracto, lo drenta servicio momentaneo, cual a wordo pidi pa prome biha. E contracto aki ta caduca automaticamente si pa 1 di maart, 2012, e no a drenta den servicio di FFD. Pues ningun momento por papia di algo irregular, of un contracto cu ta cuestionabel, pero un decision pa sigura cu e facilidadnan deportivo ta sigui ser manteni pa buena marcha di deporte. □